

श्रीः
श्रीमते रामानुजाय नमः
श्रीमते निगमान्तमहादेशिकाय नमः

कृष्णयजुर्वेदे एकाग्रिकाण्डे
॥ द्वितीयः प्रश्नः ॥

This document has been prepared by

Sunder Kidāmbi

with the blessings of

श्री रङ्गरामानुज महादेशिकन्

His Holiness śrīmad āṇḍavan śrīraṅgam

श्रीः
श्रीमते रामानुजाय नमः
श्रीमते निगमान्तमहादेशिकाय नमः

॥ द्वितीयः प्रश्नः ॥

॥ हरिः ओ(४)म् ॥

उ॒ष्णेन॑ वा॒यवु॒दके॒नेह्यदि॑तिः केशान् वपतु।

आपं॑ उ॒न्दन्तु॑ जी॒वसे॑ दी॒र्घायु॑त्वाय॒ वर्च॑से।

ज्योक्च॑ सूर्यं दृ॒शे।

येना॑व॒पथ्स॑वि॒ता क्षु॒रेण॒ सोम॑स्य॒ राज्ञो॑

वरु॑णस्य वि॒द्वान्।

तेन॑ ब्रह्मा॒णो व॑पते॒दम॒स्यायु॑ष्मा॒ञ् -

जर॑दष्टि॒र्यथा॑ऽसं॒दय॑म॒सौ।

येन॑ पू॒षा बृ॒हस्प॑ते॒रग्ने॑रिन्द्र॒स्य चा॑युषेऽव॑पत्।

तेना॑स्यायु॑षे वप॒ सौश्लो॑क्याय स्व॒स्तये॑।

येन॑ भू॒यश्च॑रा॒त्ययं॑ ज्योक्च॑ प॒श्या॑ति॒ सूर्य॑म्।

तेना॑स्यायु॑षे वप॒ सौश्लो॑क्याय स्व॒स्तये॑।

येन॑ पू॒षा बृ॒हस्प॑ते॒रग्ने॑रिन्द्र॒स्य चा॑युषेऽव॑पत्।

तेन॑ ते व॒पाम्य॑सा॒वायु॑षा॒ वर्च॑सा॒ यथा॑

ज्यो॑क्सु॒मना॒ असाः॑।

यत्क्षु॑रेण॑ म॒र्चय॑ता सु॒पेश॑सा॒

वप॑त्रा॒ वप॑सि॒ केशान्॑।

Please let us know of any errors in this text.

शुन्धि॒ शिरो॒ माऽस्यायुः॑ प्रमौषीः।
उ॒त्वाय॑ केशान् वरुणस्य॒ राज्ञो॒ बृहस्पति॑स्सविता
सोमो॑ अ॒ग्निः।
तेभ्यो॑ नि॒धानं॑ बहुधाऽन्व॑विन्दन्नन्तरा
द्यावा॑पृथि॒वी अ॒पस्सुवः॑ ॥ 1 ॥

आयुषेऽव॑पत्पञ्च॒ च ॥ 1 ॥

आ॒युर्दा॑ दे॒व ज॒रसं॑ गृणा॒नो घृ॒तप्र॑तीको
घृ॒तपृ॑ष्ठो अ॒ग्ने।
घृ॒तं पिब॑न्नमृ॒तं चारु॑ ग॒व्यं पि॒तेव॑
पु॒त्रं ज॒रसे॑ नये॒मम्।
आति॑ष्ठे॒ममश्मान॑मश्मे॒व त्वग्ग् स्थि॒रो भ॑व।
अ॒भिति॑ष्ठ पृ॒तन्य॑तस्सह॑स्व पृ॒तनाय॑तः।
रे॒वती॑स्त्वा॒ व्य॑क्ष्ण॒कृत्तिका॑श्चाकृ॒न्तग्ग्स्त्वा।
धि॒योऽव॑य॒न्नव॑ग्ना अ॒वृञ्ज॑न्त्सह॒स्रम॑न्ताग्
अ॒भितो॑ अयच्छ॒न्न।
दे॒वीदे॒वाय॑ परि॒धी सं॑वि॒त्रे
म॒हत्तदा॑सामभवन्महि॒त्व॒नम्।
या अकृ॑न्त॒न्नव॑य॒न् या अत॑न्वत॒ याश्च॑
दे॒वीर॑न्तान॒भितो॑ऽददन्त।
तास्त्वा॑ दे॒वीर्ज॒रसे॑ संव्य॑य॒न्त्वायु॑ष्मानि॒दं

परि॑ध॒थ्स्व॒ वासः॑ ।
 परि॑ध॒त्त ध॒त्त वास॑सैन॒गं श॒तायु॑षं
 कृ॒णु॒त दी॒र्घमा॑युः ।
 बृ॒ह॒स्प॒तिः प्रा॑यच्छ॒द्वासं॑ ए॒तथ्सो॑मा॒य॒
 रा॒ज्ञे परि॑धा॒त॒वा उ॑ ।
 ज॒रां ग॑च्छा॒सि परि॑ध॒थ्स्व॒ वासो॑
 भ॒वां कृ॑ष्टी॒नाम॑भि॒शस्ति॒पावा॑ ।
 श॒तं च॑ जी॒व श॒रद॑स्सु॒वर्चा॑ रा॒यश्च॒
 पोष॑मु॒प॒ संव्य॑यस्व ।
 परी॑दं वा॒सो अधि॑धा॒स्व॒स्तयेऽभू॑रापी -
 नाम॑भि॒शस्ति॒पावा॑ ।
 श॒तं च॑ जी॒व श॒रदः॑ पु॒रू॒चीर्व॑सू॒नि चा॒र्यो
 वि॑भजा॒सि जी॒वन् ।
 इ॒यं दुरु॑क्तात्प॒रि॒बाध॑माना॒ शर्म॑ वरू॒थं
 पु॒न॒ती न॒ आगा॑त् ।
 प्रा॒णा॒पा॒नाभ्यां॑ ब॒ल॑मा॒भर॑न्ती प्रि॒या
 दे॒वाना॑गं सु॒भगा॑ मे॒ख॑ले॒यम् ।
 ऋ॒तस्य॑ गो॒प्त्री तप॑सः पर॒स्पी घृ॒ती
 रक्ष॑स्सह॑माना॒ अरा॑तीः ।
 सा न॑स्सम॒न्तम॑नु॒ परी॑हि भ॒द्रया॑
 भ॒र्तारि॑स्ते॒ मेख॑ले॒ मा रि॑षाम ।

मि॒त्रस्य॒ चक्षु॑र्ध॒रुणं॒ बली॑य॒स्तेजो॑
 यश॒स्वि स्थ॒विर॒गुं समि॑द्धम्।
 अ॒ना॒ह॒न॒स्यं वस॑नं ज॒रि॒ष्णु परी॑दं
 वा॒ज्यजिनं॑ दधेऽहम् ॥ 2 ॥

दी॒र्घमा॒युस्समि॑द्धमेकं च ॥ 2 ॥

आ॒ग॒न्त्वा सम॑गन्महि प्रसुं मृ॒त्युं यु॑योतन।
 अ॒रि॒ष्टा॒स्सश्च॑रेमहि स्व॒स्ति च॑रतादिह
 स्व॒स्त्या गृ॑हेभ्यः।
 स॒मु॒द्रा॒दूर्मि॑र्मधु॒मा॒गुं उ॒दार॑दुपा॒गुंशु॒ना
 सम॑मृत॒त्वम॑श्याम्।
 इ॒मे नु॑ ते र॒श्मय॑स्सूर्य॒स्य॒ येभि॑स्सपि॒त्वं
 पि॒तरो॑ न॒ आय॑न्।
 अ॒ग्नि॑ष्टे ह॒स्तंम॑ग्रभी॒त्सोम॑स्ते ह॒स्तंम॑ग्रभी॒त्सवि॑ता ते
 ह॒स्तंम॑ग्रभी॒त्सर॑स्वती ते ह॒स्तंम॑ग्रभी॒त्पूषा॑ ते
 ह॒स्तंम॑ग्रभी॒दर्य॑मा ते ह॒स्तंम॑ग्रभी॒दगं॑शु॒स्ते
 ह॒स्तंम॑ग्रभी॒द्भगं॑स्ते ह॒स्तंम॑ग्रभी॒न्मित्र॑स्ते
 ह॒स्तंम॑ग्रभी॒न्मित्र॑स्त्वम॒सि धर्म॑णाऽग्नि॒रा॒चार्य॑स्तव।
 अ॒ग्र्यै॑ त्वा॒ परि॑ ददाम्यसौ सोमा॒य त्वा॒ परि॑
 ददाम्यसौ सवि॒त्रे त्वा॒ परि॑ ददाम्यसौ
 सर॑स्वत्यै त्वा॒ परि॑ ददाम्यसौ मृ॒त्यवे॑ त्वा॒

परि॑ द॒दाम्य॑सौ य॒माय॑ त्वा॒ परि॑ द॒दाम्य॑सौ
 ग॒दाय॑ त्वा॒ परि॑ द॒दाम्य॑सा॒वन्त॑काय त्वा॒ परि॑
 द॒दाम्य॑सा॒वद्भ्य॑स्त्वा॒ परि॑ द॒दाम्य॑सा॒वोष॑धीभ्यस्त्वा॒
 परि॑ द॒दाम्य॑सौ पृथि॒व्यै त्वा॒ सवै॑श्वान॒रायै॑
 परि॑ द॒दाम्य॑सौ।

दे॒वस्य॑ त्वा स॒वितुः॑ प्र॒स॒व उप॑नयेऽसौ।

सु॒प्र॒जाः प्र॒जया॑ भूयास्सु॒वीरो॑ वी॒रैस्सु॒वर्चा॑
 वर्च॑सा सु॒पोषः॑ पोषैः।

ब्र॒ह्म॒चर्य॑मागा॒मुप॑ मा न॒यस्व॑ दे॒वेन॑
 स॒वि॒त्रा प्र॑सूतः।

को नामा॑स्य॒सौ नामा॑ऽस्मि॒ कस्य॑ ब्रह्म॒चार्य॑स्यसौ
 प्रा॒णस्य॑ ब्रह्म॒चार्य॑स्यसा॒ वेष॑ ते॒ देव॑
 सूर्य॑ ब्रह्म॒चारी॑ तं गो॒पाय॑ स मा
 मृतै॑ष ते॒ सूर्य॑ पु॒त्रस्स[पु॒त्रस्सु] दी॑र्घा॒युस्स॒ मा मृत॑।

याग् स्व॒स्तिम॑ग्नि॒र्वायु॑स्सूर्यश्च॒न्द्रमा॑ आपोऽनु॒
 सं च॑रन्ति॒ ताग् स्व॒स्तिम॑नु॒ सं
 च॑रासा॒वध्व॑नामध्वपते॒ श्रेष्ठ॑स्याध्व॒नः पा॒रम॑शीय ॥ 3 ॥

आ॒ग॒न्ता दश॑ ॥ 3 ॥

यो॒गे॒यो॒गे त॒वस्त॑रमि॒मम॑ग्र॒ आयु॑षे॒ वर्च॑से
 कृ॒धीति॑ द्वे।

श॒तमि॒न्नु श॒रदो॑ अ॒न्ति दे॒वा यत्रा॑ नश्च॒क्रा
ज॒रसं॑ त॒नूना॑म्।

पु॒त्रासो॑ यत्र॑ पि॒तरो॑ भव॑न्ति॒ मा नो॑
म॒ध्या री॑रिष॒तायु॑र्गन्तोः॑।

अ॒ग्निष्ट॒ आयुः॑ प्र॒तरां॑ द॒धात्व॒ग्निष्टे॑
पु॒ष्टिं प्र॒तरां॑ कृ॒णोतु॑।

इन्द्रो॑ म॒रुद्भिर् ऋ॒तुधा॑ कृ॒णोत्वादि॒त्यैस्ते॑
वसु॑भि॒रा द॒धातु॑।

मे॒धां मह्य॑मङ्गि॒रसो॑ मे॒धाग्ं स॑त्त॒र्षयो॑ ददुः।

मे॒धां मह्यं॑ प्र॒जाप॑ति॒र्मेधाम॒ग्निर्द॑दातु मे।

अ॒प्स॒रासु॑ च॒ या मे॒धा ग॑न्ध॒र्वेषु॑ च॒ यद्य॑शः।

दै॒वी या॑ मा॒नुषी॑ मे॒धा सा॑ मा॒मावि॑शतादि॒ह।

इ॒मं मे॑ वरु॒ण त॒त्त्वा॑ या॒मि त्वं नो॑ अ॒ग्ने

स त्वं नो॑ अ॒ग्ने त्वम॑ग्ने अ॒याऽसि॑।

रा॒ष्ट्रभृ॑द॒स्याचा॑र्यास॒न्दी मा॑ त्वद्योषम्।

तथ्स॑वि॒तुर्व॑रेण्य॒मित्ये॑षा।

अ॒वृ॒धम॒सौ सौ॑म्य प्रा॒ण स्वं मे॑ गोपाय।

ब्रह्म॑ण आ॒णी स्थः॑ ॥ 4 ॥

त्वम॑ग्ने अ॒याऽसि॑ च॒त्वारि॑ च ॥ 4 ॥

सु॒श्रव॑स्सु॒श्रव॑सं॒ मा कुरु॑ यथा॒ त्वग्ं सु॒श्रव॑स्सु॒श्रवा॑
 अस्ये॒वम॒हग्ं सु॒श्रव॑स्सु॒श्रवा॑ भूयासं॒ यथा॒ त्वग्ं
 सु॒श्रव॑स्सु॒श्रवो॑ दे॒वानां॑ निधिगो॒पोऽस्ये॒वम॒हं
 ब्रा॑ह्म॒णानां॑ ब्रह्म॑णो निधिगो॒पो भूया॑सम्।
 स्मृतं॑ च॒ मेऽस्मृतं॑ च॒ मे तन्म॑ उ॒भयं॑ व्र॒तं
 नि॒न्दा च॒ मेऽनि॑न्दा च॒ मे तन्म॑ उ॒भयं॑
 व्र॒तग्ं श्र॒द्धा च॒ मेऽश्र॑द्धा च॒ मे तन्म॑
 उ॒भयं॑ व्र॒तं वि॒द्या च॒ मेऽवि॑द्या च॒ मे तन्म॑
 उ॒भयं॑ व्र॒तग्ं श्रु॒तं च॒ मेऽश्रु॑तं च॒ मे तन्म॑
 उ॒भयं॑ व्र॒तग्ं स॒त्यं च॒ मेऽनृ॑तं च॒ मे तन्म॑
 उ॒भयं॑ व्र॒तं तप॑श्च॒ मेऽत॑पश्च॒ मे तन्म॑
 उ॒भयं॑ व्र॒तं व्र॒तं च॒ मेऽव्र॑तं च॒ मे तन्म॑
 उ॒भयं॑ व्र॒तं यद्ब्रा॑ह्म॒णानां॑ ब्रह्म॑णि व्र॒तं
 यद्ग्रे॒स्सेन्द्र॑स्य॒ सप्र॑जापतिकस्य॒ सदे॑वस्य॒
 सदे॑वराजस्य॒ सम॑नुष्यस्य॒ सम॑नुष्यराजस्य॒
 सपि॑तृकस्य॒ सपि॑तृराजस्य॒ सग॑न्धर्वाप्सर॒स्कस्य॑।
 यन्म॑ आ॒त्मन॑ आ॒त्मनि॑ व्र॒तं तेना॒हग्ं
 सर्व॑व्रतो भूयासम्।
 उदायु॑षा स्वा॒युषो॑दोष॒धीना॒ग्ं रसे॒नोत्प॑र्जन्यस्य॒
 शुष्मे॒णोद॑स्थाम॒मृता॒ग्ं अनु॑।
 तच्चक्षु॑र्दे॒वहि॑तं॒ पुरस्ता॑च्छु॒क्रमु॑च्चरत्।

पश्येम शरदश्शतं जीवेम शरदश्शतं
 नन्दाम शरदश्शतं मोदाम शरदश्शतं
 भवाम शरदश्शतंग् शृणवाम शरदश्शतं
 प्रब्रवाम शरदश्शतमजीतास्स्याम शरदश्शतं
 ज्योक्च सुर्यं दृशे।

यस्मिन्भूतं च भव्यं च सर्वे लोकास्समाहिताः।
 तेन गृह्णामि त्वामहं मह्यं गृह्णामि त्वामहं
 प्रजापतिना त्वा मह्यं गृह्णाम्यसौ ॥ 5 ॥

सुश्रवंस्सुश्रवंसमष्टौ ॥ 5 ॥

परिं त्वाऽग्ने परिं मृजाम्यायुषा च धनेन च।
 सुप्रजाः प्रजया भूयासग्ं सुवीरो वीरैस्सुवर्चा
 वर्चसा सुपोषः पोषैस्सुगृहो गृहैस्सुपतिः पत्या
 सुमेधा मेधया सुब्रह्मा ब्रह्मचारिभिः।
 अग्र्ये समिधमाहार्षं बृहते जातवेदसे
 यथा त्वमग्ने समिधा समिध्यसं एवं
 मामायुषा वर्चसा सन्या मेधया प्रजया
 पशुभिर्ब्रह्मवर्चसेनात्राद्येन समेधय स्वाहा।
 एधोऽस्येधिषीमहि स्वाहा।
 समिदसि समेधिषीमहि स्वाहा।
 तेजोऽसि तेजो मयि धेहि स्वाहा।

अपो॑ अ॒द्यान्व॑चारि॒षगुं॑ रसे॒न॒ सम॑सृक्ष्महि।
 पय॑स्वागं अ॒ग्र आ॑गमं॒ तं मा॒ सगुं॑सृज॒ वर्च॑सा॒ स्वाहा॑॥
 सं मा॑ऽग्ने॒ वर्च॑सा॒ सृज॑ प्र॒जया॑ च॒ धने॑न च॒ स्वाहा॑॥
 वि॒द्युन्मे॑ अस्य दे॒वा इन्द्रो॑ वि॒द्यात्स॒ह
 ऋषि॑भिस्स्वाहा॑॥
 अ॒ग्रये॑ बृ॒हते॑ नाका॒य॒ स्वाहा॑॥
 द्यावा॑पृथि॒वीभ्या॑गु॒ स्वाहा॑॥
 ए॒षा ते॑ अ॒ग्ने स॒मित्तया॑ वर्ध॑स्व॒ चाप्या॑यस्व च॒
 तया॑ऽहं वर्ध॑मानो भूयासमा॒प्याय॑मानश्च॒ स्वाहा॑॥
 यो मा॑ऽग्ने भा॒गिन॑गुं स॒न्तमथा॑भा॒गं
 चि॒कीर्ष॑त्यभा॒गम॑ग्ने॒ तं कुरु॑ माम॑ग्ने
 भा॒गिनं॑ कुरु॒ स्वाहा॑॥
 स॒मिध॑मा॒धाय॑ग्ने॒ सर्व॑व्रतो भूयास॒गुं स्वाहा॑॥
 ब्र॒ह्मचा॑र्य॒स्यपो॑शान् कर्म॑ कुरु॒ मा सुषु॑प्याः।
 भि॒क्षाच॑र्यं चराचार्या॒धीनो॑ भ॒व।
 यस्य॑ ते प्रथमवा॒स्यगुं॑ हरा॑म॒स्तं त्वा॒ विश्वे॑
 अव॑न्तु दे॒वाः।
 तं त्वा॒ भ्रात॑रस्सुवृ॒धो वर्ध॑मान॒मनु॑
 जाय॑न्तां ब॒हव॑स्सुजा॑तम् ॥ 6 ॥

स॒ह ऋषि॑भिस्स्वाहा॒ नव॑ च ॥ 6 ॥

इ॒मग्ग् स्तो॒म॒मर्ह॑ते जा॒तवे॑दसे॒ रथ॑मि॒व
स॒म्म॑हे॒मा म॒नी॒षया॑।

भ॒द्रा हि नः॑ प्र॒म॑तिरस्य स॒गुं॒सद्य॑ग्रे स॒ख्ये
मा रि॑षामा व॒यं तव॑।

त्र्या॒युषं॑ ज॒मद॑ग्रेः क॒श्यप॑स्य त्र्यायुषम्।
यद्दे॒वानां॑ त्र्यायुषं तन्मे॑ अस्तु त्र्यायुषम्।
शि॒वो ना॒मासि॑ स्व॒धि॑तिस्ते पि॒ता नम॑स्ते
अस्तु॑ मा मां हि॒गं॒सीः।

उ॒ष्णेन॑ वायवुद॒केने॒त्येषः॑।

इ॒दम॒हम॒मुष्या॑मुष्याय॒णस्य॑ पा॒प्मान्
मुप॑गूहा॒म्युत्त॑रोऽसौ द्विषद्भ्यः॑।

आपो॑ हि॒ष्ठा म॑यो॒भुव॒ इति॑ ति॒स्रो
हि॒र॑ण्यवर्णा॒श्शुच॑यः पाव॒का इति॑ ति॒स्रः।

अ॒न्नाद्या॑य॒ व्यू॒हध्वं॑ दी॒र्घायु॑र॒हम॑न्ना॒दो
भू॒यास॑म्।

सोमो॑ राजा॒ यमा॑गं॒मथ्स॑ मे॒ मुखं॑ प्रवे॒क्ष्यति॑
भगे॑न स॒ह वर्च॑सा।

सोम॑स्य त॒नूर॑सि त॒नुवं॑ मे पाहि॒ स्वा
मां त॒नूरा॑वि॒श।

नमो॑ ग॒हाय॑ चाभि॒ग्राहा॑य॒ च नम॑श्शाकजञ्ज॒भाभ्यां॑
नम॒स्ताभ्यो॑ दे॒वता॑भ्यो॒ या अ॑भि॒ग्राहि॑णीः।

अ॒प्सर॒स्सु॒ यो ग॒न्धो ग॒न्ध॒र्वेषु॑ च॒ यद्य॑शः।
 दै॒वो यो मा॑नु॒षो ग॒न्ध॒स्स मा॑
 ग॒न्ध॒स्सु॒रभि॑र्जुषताम्।
 इ॒यमोष॑धे॒ त्राय॑माणा॒ सह॑माना॒ सह॑स्वती।
 सा मा॒ हिर॑ण्यवर्चसं॒ ब्रह्म॑वर्च॒सिनं॑ मा॒ करो॑तु।
 अ॒पा॑शो॒ऽस्यु॑रो॒ मे मा॒ सग्ं॑ शा॒री॒शिश॒वो मोष॑
 तिष्ठ॑स्व दी॒र्घायु॑त्वाय॒ श॒तशा॑रदाय।
 श॒तग्ं॑ श॒रद्भ्य॒ आयु॑षे॒ वर्च॑से जी॒वात्वै॑ पु॒ण्याय॑।
 रे॒वती॑स्त्वा॒ व्य॑क्ष्ण॒न्नित्ये॒ताः ॥ 7 ॥

स॒ह॒ वर्च॑सा॒ नव॑ च ॥ 7 ॥

आ॒यु॒ष्यं॑ वर्च॒स्यग्ं॑ सु॒वीर्य॑ग्ं॒ रा॒य॒स्पोष॑मौ॒द्भिद्य॑म्।
 इ॒दग्ं॑ हिर॑ण्यं॒ जैत्र्या॒यावि॑शतां॒ माम्।
 उ॒च्चैर्वा॑दि॒ पृत॑ना॒जि सं॑त्रासा॒हं ध॑नञ्ज॒यम्।
 सर्वा॑स्समृ॒द्धीर् ऋ॒द्धयो॒ हिर॑ण्ये॒ऽस्मिन्ध॑स॒माहि॑ताः।
 शु॒नम॑ह॒ग्ं हिर॑ण्यस्य पि॒तुरि॑व॒ नामा॑ग्रभैषम्।
 तं मा॒ हिर॑ण्यवर्चसं॒ पूरु॑षु॒ प्रियं॑ कुरु।
 प्रि॒यं मा॑ दे॒वेषु॑ कुरु प्रि॒यं मा॒ ब्रह्म॑णे कुरु।
 प्रि॒यं वि॒श्येषु॑ शू॒द्रेषु॑ प्रि॒यग्ं॑ राज॑सु मा कुरु।
 या ति॒रश्ची॑ नि॒पद्य॑से॒ऽहं वि॒धर॑णी॒ इति॑।
 तां त्वा॑ घृ॒तस्य॒ धार॑या॒ यजे॑ स॒गुं॒राध॑नीम॒हम्।

स॒ग॒रा॒ध॒न्यै॑ दे॒व्यै॑ स्वाहा॑ प्र॒सा॒ध॒न्यै॑ दे॒व्यै॑ स्वाहा॑।
स॒म्राजं॑ च वि॒राजं॑ चाभि॒श्री॒र्या च॑ नो गृ॒हे।
ल॒क्ष्मी॑ रा॒ष्ट्रस्य॑ या मुखे॒ तया॑ मा॒ सगं॑ सृ॒जाम॑सि।
शु॒भि॒के शि॒र आ॒रो॒ह शो॒भय॑न्ती॒ मुखं॑ मम॑।
मुख॑गं हि॒ मम॑ शोभय॒ भूया॑गंसं च॒ भगं॑ कुरु।
या॒मा॒ह॒र॒ञ्ज॒म॒द॒ग्नि॒श्च॒द्धा॒यै॑ का॒मया॑न्यै।
इ॒मां ता॑मपि॒ नह्ये॑ऽहं भगे॑न स॒ह वर्च॑सा।
यदा॑ञ्ज॒नं त्रै॒ककु॑दं जा॒तगं॑ हि॒मव॑त उ॒परि॑।
तेन॑ वा॒माञ्जे॒ तेज॑से॒ वर्च॑से॒ भगा॑य च ॥ ४ ॥

स॒ग॒रा॒ध॒नी॒म॒हं॑ नव॑ च ॥ ४ ॥

मयि॑ पर्व॒तपू॒रुषं॑ मयि॑ पर्व॒तव॑र्चसं॒ मयि॑
पर्व॑तभेष॒जं मयि॑ पर्व॒तायु॑षम्।
यन्मे॒ वर्चः॑ प॒राग॑तमा॒त्मानं॑मु॒पति॑ष्ठतु।
इ॒दं तत्पु॑न॒राद॑दे दी॒र्घायु॑त्वाय॒ वर्च॑से।
प्र॒ति॒ष्ठे स्थो॑ दे॒वता॑नां॒ मा मा॒ सन्ता॑प्तम्।
प्र॒जाप॑ते॒श्शर॑णमसि॒ ब्रह्म॑णश्छु॒दिर्वि॑श्व॒जन॑स्य
छा॒याऽसि॑ सर्व॒तो मा॑ पाहि।
दे॒वस्य॑ त्वा स॒वितुः॑ प्र॒सवे॑ऽश्विनो॑र्बा॒हुभ्या॑
पू॒ष्णो ह॑स्ता॒भ्यामा॑द॒दे द्वि॑ष॒तो व॒धाये॑न्द्र॒स्य
वज्रो॑सि॒ वार्त्र॑घ्न॒श्शर्म॑ मे भव॒ यत्पा॑पं तन्निवा॑रय।

देवीं॑ष्पडुर्वी॑रित्येषा।

राष्ट्र॑भृद॑स्याचा॒र्यास॒न्दी मा त्वद्यो॑षग्ं

राष्ट्र॑भृद॑सि स॒म्राडास॒न्दी मा त्वद्यो॑षग्ं

राष्ट्र॑भृद॑स्यधि॒पत्यास॒न्दी मा त्वद्यो॑षम्।

आपः॑ पादाव॒नेज॑नीर्द्विष॒न्तं नाश॑यन्तु मे।

अ॒स्मिन्कु॑ले॑ ब्रह्मवर्च॑स्य॒सानि॑।

मयि॑ महो॒ मयि॑ यशो॒ मयीन्द्रि॑यं वी॒र्यम्॑।

आमा॑ग॒न् यश॑सा॒ वर्च॑सा॒ सग्सृ॑ज॒ पय॑सा॒

तेज॑सा च।

तं मा॑ प्रि॒यं प्र॒जानां॑ कुर्वधि॑पतिं पशूनाम्।

विरा॑जो दोहो॑ऽसि वि॒राजो॒ दोह॑मशीय॒ मम॒

पद्या॑य॒ विरा॑ज।

स॒मुद्रं॑ वः प्र हि॑णोमि॒ स्वां योनि॑मपिगच्छत।

अच्छि॑द्रः प्र॒जया॑ भूयास॒ मा परा॑सेचि॒ मत्पयः॑ ॥ 9 ॥

अ॒सानि॑ षट् चं ॥ 9 ॥

त्रय्यै॑ वि॒द्यायै॒ यशो॑ऽसि॒ यश॑सो॒ यशो॑ऽसि॒

ब्रह्म॑णो॒ दीप्ति॑रसि।

तं मा॑ प्रि॒यं प्र॒जानां॑ कुर्वधि॑पतिं पशूनाम्।

आ मा॑ ग॒न्नित्ये॑षा।

अ॒मृतो॑प॒स्तर॑णमस्य मृतापि॒धान॑मसि।

यन्मधु॑नो मधु॒व्यं पर॒मम॒न्नाद्यं॑ वी॒र्यम्॑ ।
 तेना॒हं मधु॑नो मधु॒व्येन॑ पर॒मेणा॒न्नाद्ये॑न
 वी॒र्येण॑ पर॒मोऽन्ना॒दो म॑धु॒व्योऽसानि॑ ।
 गौर॒स्यप॑हतपा॒प्माऽप॑ पा॒प्मानं॑ जहि॒ मम॑ चा॒मुष्यं॑ च ।
 अ॒ग्निः प्रा॒श्नातु॑ प्रथ॒मस्स॑ हि वेद् यथा॑ ह॒विः ।
 अन॑ष्टम॒स्माकं॑ कृ॒ण्वन्ब्रा॑ह्म॒णो ब्रा॑ह्म॒णेभ्यः॑ ।
 य॒ज्ञो वर्ध॑तां य॒ज्ञस्य॑ वृ॒द्धिम॑नु॒ वर्धा॑ऽप॑
 चि॒तिर॒स्यप॑चि॒तिं मा कु॑र्व॒पचितो॑ऽहं
 म॑नु॒ष्येषु॑ भूयासम् ।
 गौ॒र्धेनु॑भ॒व्या मा॒ता रु॒द्राणां॑ दुहि॒ता वसू॑ना॒ग्
 स्वसा॑ऽऽदि॒त्याना॑म॒मृत॑स्य॒ नाभिः॑ ।
 प्र॒णु वोचं॑ चि॒कितु॑षे॒ जना॑य॒ मा
 गा॒मना॑गा॒मदि॑तिं वधिष्ट ।
 पि॒बंतू॑दकं तृ॒णान्य॑त्तु ।
 ओमु॒थ्सृ॑जत ।
 भू॒तम् ।
 सा वि॒राट् ।
 तन्मा॑ क्षा॒यि तस्य॑ तेऽशी॑य॒ तन्म॑ ऊ॒र्जं धाः॑ ।
 ओं कल्प॑यत ॥ 10 ॥

भू॒यास॑म॒ष्टौ च॑ ॥ 10 ॥

धा॒ता दं॑दातु नो र॒यिमि॑ति॒ चत॑स्रो॒ यस्त्वा॑
हृ॒दा की॑रिणेति॒ चत॑स्रः।

भूर्भुव॑स्सुवो॒ रा॒काम॑हं यास्तै॑ राके।
यौग॑न्धरिरे॒व नो॒ राजे॑ति॒ साल्वी॑रवादिषुः।
विवृ॑त्तचक्रा॒ आसी॑ना॒स्तीरे॑ण यमुने॒ तव॑।
सोम॑ ए॒व नो॒ राजे॑त्याहुर्ब्राह्म॒णीः प्र॒जाः।
विवृ॑त्तचक्रा॒ आसी॑ना॒स्तीरे॑णासौ॒ तव॑।
पु॒गं॒स॒वन॑मसि।

आ॒भि॒ष्ट्वाऽहं॑ द॒शभि॑र॒भिमृ॑शामि॒ दश॑मास्याय॒
सू॒त॒वे।

यथै॒व सोमः॑ पव॑ते॒ यथा॑ समु॒द्र एज॑ति।
ए॒वं ते गर्भ॑ एज॑तु स॒ह ज॒रायु॑णा नि॒ष्क्रम्य॑
प्रति॑तिष्ठ॒त्वायु॑षि ब्रह्मवर्च॒सि यश॑सि वी॒र्ये॑ऽन्नाद्यै॑।

दश॑मासा॒श्च श॑यानो धा॒त्रा हि तथा॑ कृ॒तम्।
ऐतु॑ गर्भो॒ अक्ष॑तो जी॒वो जीव॑न्त्याः।
आ॒यम॑नीर्यमयत॒ गर्भ॑मापो॒ देवी॑स्सर॑स्वतीः।
ऐतु॑ गर्भो॒ अक्ष॑तो जी॒वो जीव॑न्त्याः।
ति॒ल॒देऽव॑ पद्यस्व॒ न मा॒गुं॒सम॑सि॒ नोदल॑म्।
स्थवि॑त्र्यव॑पद्यस्व॒ न मा॒गुं॒सेषु॑ न स्त्राव॑सु॒ न
ब॒द्धम॑सि म॒ञ्जसु॑।

निरै॑तु पृश्नि॒ शेव॑लग्ं शु॒ने ज॒राय्व॑त्तवै॑।

दिवस्परीत्येषोऽनुवाकः।

अस्मिन्नहगं सहस्रं पुष्याम्येधमानास्वे वशैः।

अङ्गादङ्गात्सं भवसि हृदयादधि जायसे।

आत्मा वै पुत्रनामाऽसि स जीव शरदश्शतम् ॥ 11 ॥

अन्नाद्यै जायस एकं च ॥ 11 ॥

अश्मा भव परशुर्भव हिरण्यमस्तृतं भव।

पशूनां त्वा हिङ्गारेणाभिजिघ्राम्यसौ।

मेधां ते देवस्सविता मेधां देवी सरस्वती।

मेधां ते अश्विनौ देवावाधत्तां पुष्करस्रजा।

त्वयि मेधां त्वयि प्रजां त्वय्यग्निस्तेजो दधातु

त्वयि मेधां त्वयि प्रजां त्वयीन्द्र

इन्द्रियं दधातु त्वयि मेधां त्वयि

प्रजां त्वयि सूर्यो भ्राजो दधातु।

क्षेत्रियै त्वा निर्ऋत्यै त्वा द्रुहो मुञ्चामि

वरुणस्य पाशात्।

अनागसं ब्रह्मणे त्वा करोमि शिवे ते

द्यावापृथिवी उभे इमे।

शं ते अग्निस्सहाद्विरस्तु शं

द्यावापृथिवी सहोषधीभिः।

शमन्तरिक्षगं सह वातेन ते शं ते चतस्रः

प्र॒दि॒शो॑ भवन्तु।
 या दै॒वी॒श्च॒त॒स्रः॑ प्र॒दि॒शो॑ वा॒त॒प॒त्नी॒र॒भि
 सूर्यो॑ वि॒च॒ष्टे।
 तासां॑ त्वाऽऽज॒र॒स॒ आ द॑धामि प्र यक्ष्मं ए॒तु
 नि॒र्ऋ॑तिं परा॒चैः।
 अमो॑चि॒ यक्ष्मा॑दु॒रि॒ताद॑व॒त्यै द्रु॒हः
 पाशा॑न्नि॒र्ऋ॑त्यै चोद॑मोचि।
 अहा॒ अव॑र्ति॒मवि॑द॒थ्स्यो॒नम॑प्य॒भूद्भू॒द्रे
 सु॒कृ॒त॒स्य॑ लो॒के।
 सूर्य॑मृ॒तं तम॑सो॒ ग्राह्या॒ यद्दे॒वा
 अमु॑श्च॒न्नसृ॑ज॒न्व्ये॑नसः।
 ए॒वम॒हमि॑मं क्षे॒त्रि॒याज्जा॑मि॒शगुं॒साद्ब्रु॒हो मु॑ञ्चामि
 वरु॑णस्य॒ पाशा॑त्।
 भूस्स्वाहा॒ भुव॑स्स्वाहा॒ सुव॑स्स्वाहो॒ग् स्वाहा॑ ॥ 12 ॥

वि॒च॒ष्टे षट्चं ॥ 12 ॥

मा ते॑ कु॒मा॒र॒गं र॒क्षो॑ वधी॒न्मा
 धे॒नुर॑त्यासा॒रिणी॑।
 प्रि॒या धन॑स्य भूया॒ एध॑माना॒ स्वे गृ॒हे।
 अ॒यं कु॑मा॒रो ज॒रां ध॑यतु दी॒र्घमा॑युः।
 यस्मै॒ त्वग्ग् स्त॒न प्र॑प्या॒यायु॑र्व॒र्चो॒ यशो॑ बल॑म्।

यद्भूमेर् हृदयं दिवि चन्द्रमसि श्रितम्।
 तदुर्वि पश्यं माऽहं पौत्रमघग्ं रुदम्।
 यत्ते सुसीमे हृदयं वेदाहं तत्प्रजापतौ।
 वेदाम् तस्यं ते वयं माऽहं पौत्रमघग्ं रुदम्।
 नामयति न रुदति यत्र वयं वेदामसि
 यत्र चाभिमृशामसि।
 आपस्सुतेषु जाग्रत रक्षागंसि निरितो नुदध्वम्।
 अयं कलिं पतयन्तग्ं श्वानमिवोद्वृद्धम्।
 अजां वाशितामिव मरुतः पर्याध्वग्ं स्वाहा॥
 शण्डेरथश्शण्डिकेर उलूखलः।
 च्यवनो नश्यतादितस्स्वाहा॥
 अयश्शण्डो मर्क उपवीरं उलूखलः।
 च्यवनो नश्यतादितस्स्वाहा॥
 केशिनीश्श्वलोमिनीः खजापोऽजोपकाशिनीः।
 अपेत नश्यतादितस्स्वाहा॥
 मिश्रवाससः कौबेरका रक्षोराजेन प्रेषिताः।
 ग्रामग्ं सजानयो गच्छन्तीच्छन्तोऽपरिदाकृतान्स्वाहा॥
 एतान्मृतैतान्गृहीतेत्ययं ब्रह्मणस्पुत्रः।
 तानग्निः पर्यसरत्तानिन्द्रस्तान्बृहस्पतिः।
 तानहं वेद ब्राह्मणः प्रमृशतः कूटदन्तान्
 विकेशान्लम्बनस्तनान्स्वाहा॥ 13 ॥

निरितो नुदध्वग्ग् स्वाहा त्रीणि च ॥ 13 ॥

न॒क्त॒ञ्च॒रि॒णं॑ उरस्पेशाञ्छूलहस्तान्कपालपान्।

पूर्व॑ एषां पितेत्युच्चैश्श्राव्यकर्णकः।

मा॒ता ज॑घ्न्या सर्पति॒ ग्रामे॑ विधुरमिच्छन्ती॒ स्वाहा॑।

नि॒शी॒थ॒चा॒रि॒णी॒ स्वसा॑ स॒न्धिना॒ प्रेक्षे॑ते॒ कुल॑म्।

या स्वप॑न्तं बोधयति॒ यस्यै॒ विजा॑तायां॒ मनः॑।

तासां॒ त्वं कृ॑ष्णव॒र्त्मने॑ क्लो॒मान॒गुं हृद॑यं॒ यकृ॑त्।

अग्ने॒ अक्षी॑णि निर्दह॒ स्वाहा॑।

अङ्गा॑दङ्गा॒त्संभ॑वसि॒ हृद॑या॒दधि॑जायसे।

वेदो॒ वै पु॑त्र॒नामा॑ऽसि॒ स जी॑व श॒रद॑श्श॒तम्।

अश्मा॑ भ॒वेत्ये॑षा।

अ॒ग्निरायु॑ष्मानिति॒ पञ्च॑।

सर्व॑स्मादा॒त्मन॒स्संभू॑ताऽसि॒ सा जी॑व श॒रद॑श्श॒तम्।

भूर॒पां त्वौष॑धीना॒गुं रसं॑ प्राशयामि शि॒वास्त॒

आप॒ ओष॑धयस्सन्त्वनमी॒वास्त॒ आप॒

ओष॑धयस्सन्त्वसौ।

भुवो॒ऽपागुं॑ सुव॒र॒पां भूर्भुव॑स्सुव॒र॒पां त्वौष॑धीना॒गुं

रसं॑ प्राशयामि शि॒वास्त॒ आप॒ ओष॑धयस्सन्त्वनमी॒वास्त॒

आप॒ ओष॑धयस्सन्त्वसौ।

[भूर॒पां त्वौष॑धीना॒गुं रसं॑ प्राशयामि शि॒वास्त॒

आप॒ ओष॑धयस्सन्त्वनमी॒वास्त॒ आप॒
 ओष॑धयस्सन्त्वसौ॒ भुवो॒ऽपाग्ं सु॒वर॒पां भूर्भुव॒स्सुवर॒पां
 त्वौष॑धीना॒गुं रसं॒ प्राश॑यामि शि॒वास्त॒ आप॒
 ओष॑धयस्सन्त्वनमी॒वास्त॒ आप॒ ओष॑धयस्सन्त्वसौ।]

उ॒ष्णेन॑ वायवुद॒केनेत्ये॒षः ॥ 14 ॥

ए॒षा च॒त्वारिं॑ च ॥ 14 ॥

यद्भूमैः॑ क्रूरं तदितो ह॑रामि॒ परा॑चीं
 निर्ऋ॑तिं॒ निर्वा॑हयामि।
 इ॒दग्ं श्रेयो॑ऽव॒सान॒माग॑न्म दे॒वा
 गोम॒दश्वा॑वदि॒दम॑स्तु प्र भूम॑।
 स्यो॒ना पृ॑थिवि॒ भवा॑नृक्ष॒रा नि॒वेश॑नी।
 यच्छा॑ न॒शर्म॑ स॒प्रथाः॑।
 इ॒हैव तिष्ठ॑ निमि॒ता तिल्व॑ला स्या॒दिरा॑वती।
 मध्ये॒ ताल्प्य॑स्य॒ तिष्ठा॑न्मा त्वा॒ प्राप॑न्नघा॒यवः॑।
 आ त्वा॑ कुमा॒रस्तरु॑ण॒ आ व॒त्सो जग॑ता स॒ह।
 आ त्वा॑ परि॒स्रुतः॑ कुम्भा आ द॒ध्नः कल॑शीरयन्।
 ऋ॒तेन॒ स्थूणा॑वधि॒रोह॑ व॒गुंशो॒ग्रो
 वि॒राज॑न्नप॒सेध॑ शत्रून्।
 ब्रह्म॑ च ते क्ष॒त्रं च॒ पूर्वे॒ स्थूणे॑ अ॒भि र॑क्षतु।
 य॒ज्ञश्च॒ दक्षि॑णाश्च॒ दक्षि॑णे

इषश्चोर्जश्चापरे मित्रश्च वरुणश्चोत्तरे।
 धर्मस्ते स्थूणां राजश्श्रीस्ते स्तूपः।
 उद्घ्रियमाण उद्धर पाप्मनो मा यदविद्वान्
 यच्च विद्वाग्श्चकार।
 अहा यदेनः कृतमस्ति पापगं रात्र्या यदेनः
 कृतमस्ति पापगं सर्वस्मान्मोद्धृतो मुश्च तस्मात्।
 इन्द्रस्य गृहा वसुमन्तो वरूथिनस्तानहगं
 सुमनसः प्रपद्ये।
 अमृताहुतिममृतायां जुहोम्यग्निं
 पृथिव्याममृतस्य जित्यै
 तयाऽनन्तं काममहं जयानि प्रजापतिर्यं
 प्रथमो जिगायाग्निमग्नौ स्वाहा।
 अन्नपत इत्येषा।
 अरिष्टा अस्माकं वीरास्सन्तु मा परासेचि मे धनम्।
 भूमिर्भूमिमगान्माता मातरमप्यगात्।
 भूयास्मं पुत्रैः पशुभिर्यो नो द्वेष्टि स भिद्यताम्।
 वास्तोष्पत इति द्वे।
 वास्तोष्पते प्रतरणो न एधि गोभिरश्वेभिरिन्दो।
 अजरासस्ते सख्ये स्याम पितेवं पुत्रान्प्रति
 नो जुषस्व।
 अमीवहा वस्तोष्पते विश्वां रूपाण्याविशन्।

सखांसु शेव एधि नः।

शिवगुं शिवम् ॥ 15 ॥

अभिरक्षतु भिद्यतागुं षट्च ॥ 15 ॥

कूर्कुरः सुकूर्कुरः कूर्कुरो वालबन्धनः।

उपरिष्टाद्यदेजाय तृतीयस्या इतो दिवः।

औलब इत्तमुपाह्वयथार्जीञ्छ्यामश्शबलः।

अधोरांम उलुम्बलः सारमेयो ह धावति

समुद्रमवचाकशत्।

बिभ्रन्निष्कं च रुक्मं च शुनामग्रगुं सुबीरिणः।

सुबीरिण सृजसृज शुनक सृजैकव्रात्य सृजच्छत्।

तथसत्यं यत्त्वेन्द्रोऽब्रवीद्भास्पाशयस्वेति तास्त्वग्गुं

स्पाशयित्वाऽऽगच्छस्तं त्वाऽब्रवीदविद हा(३)

इत्यविदगुंहीति वरं वृणीष्वेति कुमारमेवाहं

वरं वृण इत्यब्रवीर्विगृह्य

बाहू प्लवसे द्यामवचाकशत्।

बिभ्रन्निष्कं च रुक्मं च शुनामग्रगुं सुबीरिणः।

सुबीरिण सृजसृज शुनक सृजैकव्रात्य सृजच्छत्।

तथसत्यं यत्ते सरमा माता लोहितः पिता।

अमी एके सरस्यका अवधावति तृतीयस्या इतो दिवः।

तेकश्च ससरमतण्डश्च तूलश्च वितूलश्चार्जुनश्च लोहितश्च।

दुलां ह॒ नाम॑ वो मा॒ता म॒न्था॑क॒को ह॑ वः पि॒ता।
 सं तक्षा॑ ह॒न्ति च॒क्री वो॒ न सी॑स॒रीद॑त।
 छु॒द॒पेहि॑ सी॒सर॑म सा॒रमे॑य॒ नम॑स्ते अस्तु सी॒सर।
 सम॑श्वा वृषा॑णः प॒दो न सी॑स॒रीद॑त।
 छु॒द॒पेहि॑ सी॒सर॑म सा॒रमे॑य॒ नम॑स्ते अस्तु सी॒सर।
 श्वा॒नमि॒च्छ्वाऽद॒न्न पु॑रुष॒ञ्छत्।
 ए॒ते ते॒ प्रति॑दृश्येते स॒मा॒न॒व॑सने उ॒भे।
 ते अ॒ह॒गं सा॒रये॑ण॒ मुस॑ले॒नाव॑ह॒न्म्यु॒लूख॑ले।
 ह॒तश्श॑ङ्खो ह॒तश्श॑ङ्ख॒पि॒ता ह॒तश्श॑ङ्ख॒कुतु॑र्व॒कः।
 अप्ये॑षाग् स्थ॒पति॑र् ह॒तः।
 ऋषि॑र्बोधः प्रबो॑ध॒स्वप्रो॑ मा॒तरि॒श्वौ।
 ते ते॑ प्रा॒णान्थ॑स्प॒रिष्य॑न्ति॒ मा भै॑षी॒र्न म॑रि॒ष्यसि॑।
 ज॒ग्धो म॑श॒को ज॒ग्धा वि॑तृष्टि॒र्ज॒ग्धो व्य॑ध्व॒रस्स्वाहा॑
 ज॒ग्धो व्य॑ध्व॒रो ज॒ग्धो म॑श॒को ज॒ग्धा वि॑तृष्टि॒स्स्वाहा॑
 ज॒ग्धा वि॑तृष्टि॒र्ज॒ग्धो व्य॑ध्व॒रो ज॒ग्धो म॑श॒कस्स्वाहा॑ ॥ 16 ॥

पि॒ताऽव॑ह॒न्म्यु॒लूख॑ले॒ पञ्च॑ च ॥ 16 ॥

इन्द्रं॑ जहि द॒न्द॒शूकं॑ प॒क्षि॒णं य॑स्सरी॒सृपः॑।
 द॒ङ्क्ष॑न्तं च द॒श॒न्तं च॒ सर्वा॑ग॒स्तानि॑न्द्र ज॒म्भय॑ स्वाहा॑।
 अ॒प्सु जा॑त॒ सरै॑ वृद्ध दे॒वाना॑मपि॒ हस्त्य॑।
 त्वम॑ग्न इन्द्र॒प्रेषि॑त॒स्स नो॒ मा हि॑ग॒सी॒स्स्वाहा॑।

त्राणमसि परित्राणमसि परिधिरसि।
 अत्रेन मनुष्याग्ं स्नायसे तृणैः पशून्गर्तेन
 सर्पान् यज्ञेन देवान्थस्वधयां पितृन्थस्वाहा।
 तथ्सत्यं यत्तेऽमावास्यायां च पौर्णमास्यां च
 विषंबलिग्ं हरन्ति सर्व उदरसर्पिणः।
 तत्ते प्रेरंते त्वयि संविशन्ति त्वयि नस्सतस्त्वयि
 सद्भ्यो वृषाभ्यो नः परिदेहि।
 नमो अस्तु सर्पेभ्य इति तिस्रः।
 नमो अस्तु सर्पेभ्यो ये पार्थिवा य आन्तरिक्ष्या
 ये दिव्या ये दिश्याः।
 तेभ्य इमं बलिग्ं हरिष्यामि तेभ्य इमं बलिमहार्षम्।
 तक्षक वैशालेय धृतराष्ट्रैरावतस्ते जीवास्त्वयि
 नस्सतस्त्वयि सद्भ्यो वृषाभ्यो नः परिदेहि।
 धृतराष्ट्रैरावत तक्षक वैशालेयस्ते जीवास्त्वयि
 नस्सतस्त्वयि सद्भ्यो वृषाभ्यो नः परिदेहि।
 अहिग्ंसाऽतिबलस्ते जीवास्त्वयि नस्सतस्त्वयि
 सद्भ्यो वृषाभ्यो नः परिदेहि।
 अतिबलाऽहिग्ंसस्ते जीवास्त्वयि नस्सतस्त्वयि
 सद्भ्यो वृषाभ्यो नः परिदेहि।
 ये दन्दशूकाः पार्थिवास्ताग्स्त्वमितः
 पुरोगव्युति निवेशय।

सन्ति॒ वै न॑श्श॒फिन॒स्सन्ति॑ द॒ण्डिन॒स्ते वो॒
 ने॒द्धिन॑सा॒न्त्येद्व्यू॒यम॒स्मान् हि॒नसा॑त।
 स॒मीची॒ नामा॑सि॒ प्राची॒दिग्धे॒तयो॒ नाम॒ स्थेति॑
 द्वा॒दश॑ पर्यायाः।
 अप॑श्चेत॒ प॒दा ज॑हि॒ पूर्वे॑ण॒ चाप॑रेण च।
 स॒प्त च॒ मानु॑षीरि॒मास्ति॒स्रश्च॑ रा॒जब॑न्धवीः।
 न वै श्वे॒तस्या॑ध्याच॒रेऽहि॑र्जघान॒ कश्च॑न।
 श्वे॒ताय॑ वै॒र्वाय॑ नमो॒ नम॑श्श्वे॒ताय॑ वै॒र्वाय॑ ॥ 17 ॥

दि॒श्यां रा॒जब॑न्धवी॒र्द्धे च॑ ॥ 17 ॥

प॒र॒मे॒ष्ठसि॑ प॒र॒मां मा॒गु श्रि॑यं गमय
 प्र॒त्यव॑रूढो नो हे॒मन्तः॑।
 प्र॒ति॑ क्ष॒त्रे प्र॒ति॑ तिष्ठामि रा॒ष्ट्रे
 प्र॒त्यश्वे॑षु प्र॒ति॑ तिष्ठामि गो॒षु।
 प्र॒ति॑ प्र॒जायां॑ प्र॒ति॑ तिष्ठामि॒ भव्यै॑।
 इ॒ह धृ॑तिरि॒ह वि॒धृति॑रि॒ह रन्ति॑रि॒ह रम॑तिः।
 स्यो॒ना पृ॑थिवि॒ बडि॑त्था पर्व॒ताना॑मिति॒ द्वे।
 आ त्वा॑ वहन्तु॒ हर॑य॒स्सचे॑तसश्श्वे॒तैरश्वै॑स्स॒ह के॑तुमद्भिः।
 वाता॑जि॒रैराया॑हि॒ मम॑ ह॒व्याय॑ श॒र्वोप॑स्पृशतु
 मी॒ढ्वा॒न्मी॒दुषे॒ स्वा॒होप॑स्पृशतु मी॒दुषी॑
 मी॒दुष्यै॒ स्वाहा॑ जय॒न्तोप॑स्पृश जय॒न्ताय॑

स्वाहा॑ भ॒वाय॑ दे॒वाय॑ स्वाहा॑ श॒र्वाय॑ दे॒वाय॑
 स्वाहे॑शा॒नाय॑ दे॒वाय॑ स्वाहा॑ प॒शुप॑तये दे॒वाय॑
 स्वाहा॑ रु॒द्राय॑ दे॒वाय॑ स्वाहो॑ग्राय॑ दे॒वाय॑ स्वाहा॑
 भी॒माय॑ दे॒वाय॑ स्वाहा॑ म॒ह॒ते दे॒वाय॑ स्वाहा॑
 भ॒वस्य॑ दे॒वस्य॑ प॒त्यै॑ स्वाहा॑ श॒र्वस्य॑ दे॒वस्य॑
 प॒त्यै॑ स्वहे॑शा॒नस्य॑ दे॒वस्य॑ प॒त्यै॑ स्वाहा॑
 प॒शुप॑ते॒र्दे॒वस्य॑ प॒त्यै॑ स्वाहा॑ रु॒द्रस्य॑ दे॒वस्य॑
 प॒त्यै॑ स्वाहो॑ग्रस्य॑ दे॒वस्य॑ प॒त्यै॑ स्वाहा॑
 भी॒मस्य॑ दे॒वस्य॑ प॒त्यै॑ स्वाहा॑ म॒हतो॑
 दे॒वस्य॑ प॒त्यै॑ स्वाहा॑ ज॒य॒न्ताय॑ स्वाहा॑ऽग्र॒ये॑
 स्वि॑ष्ट॒कृ॒ते सु॒हु॒त॒हु॒दाहु॑तीनां॒ कामा॑नागं
 सम॑र्धयि॒त्रे स्वाहा॑॥

स्व॒स्ति नः॑ पूर्ण॒मुखः॑ परि॒क्राम॑तु गृह॒पोप॑स्पृश
 गृह॒पाय॑ स्वाहा॑ गृह॒प्युप॑स्पृश गृह॒प्यै
 स्वाहा॑ घो॒षिण॑ उप॑स्पृशत घो॒षिभ्य॑स्स्वाहा॑ श्वा॒सि॒न्
 उप॑स्पृशत श्वा॒सिभ्य॑स्स्वाहा॑ वि॒चि॒न्वन्त॑
 उप॑स्पृशत वि॒चि॒न्वद्भ्य॑स्स्वाहा॑ प्र॒पु॒न्वन्त॑
 उप॑स्पृशत प्र॒पु॒न्वद्भ्य॑स्स्वाहा॑ सम॒श्रन्त॑
 उप॑स्पृशत सम॒श्रद्भ्य॑स्स्वाहा॑ दे॒वसे॒ना
 उप॑स्पृशत दे॒वसे॒नाभ्य॑स्स्वाहा॑ या आ॒ख्या॑ता
 याश्च॑ना॒ख्या॑ता दे॒वसे॒ना उप॑स्पृशत

देवसे॒नाभ्यः॑ स्वाहा॑
 द्वा॒रपो॑प॒स्पृश॑ [द्वा॒रापो॑प॒स्पृश॑]
 द्वा॒रपा॑य [द्वा॒रापा॑य] स्वाहा॑
 द्वा॒रप्यु॑प॒स्पृश॑ [द्वा॒राप्यु॑प॒स्पृश॑]
 द्वा॒रप्यै॑ [द्वा॒राप्यै॑]
 स्वाहा॑ऽन्वासा॒रिण॑ उ॒प॒स्पृश॑ता॒न्वासा॒रिभ्यः॑ स्वाहा॑
 निष॒ङ्गि॑न्नु॒प॒स्पृश॑ निष॒ङ्गि॑णे॒ स्वाहा॑ नमो॑
 निष॒ङ्गि॑णं॒ इषु॑धि॒मते॑ क्षेत्र॑स्य॒ पति॑ना व॒यमि॑ति॒ द्वे ॥ 18 ॥

पर॒मे॒ष्ठसि॑ पर॒माम॒ष्टौ ॥ 18 ॥

यन्मे॑ मा॒ता प्रलु॑लोभ॒ चर॒त्यन॑नु॒व्रता॑ ।
 तन्मे॑ रे॒तः पि॒ता वृ॑ङ्क्तां
 मा॒भुर॑ण्योऽव॑पद्यता॒मुष्मै॑ स्वाहा॑ ।
 यास्तिष्ठ॑न्ति॒ या धाव॑न्ति॒ या
 आ॑द्रो॒घ्नीः परि॑त॒स्थुषीः॑ ।
 अ॒द्भिर्वि॑श्व॑स्य भ॒र्त्रीभि॑र॒न्तर॑न्यं
 पि॒तुर्द॑धेऽमुष्मै॑ स्वाहा॑ ।
 यन्मे॑ पि॒ताम॒ही प्रलु॑लोभ॒ चर॒त्यन॑नु॒व्रता॑ ।
 तन्मे॑ रे॒तः पि॒ताम॒हो वृ॑ङ्क्तां
 मा॒भुर॑ण्योऽव॑पद्यता॒मुष्मै॑ स्वाहा॑ ।
 अ॒न्तर्द॑धे॒ पर्व॑तैर॒न्तर्म॑ह्या॒ पृथि॑व्या ।

आ॒भिर्दि॒ग्भिर॑न॒न्ताभि॑र॒न्तर॒न्यं
 पि॒ताम॒हाद्वे॑ऽमु॒ष्मै॒ स्वाहा॑।
 यन्मे॑ प्र॒पिताम॒ही प्र॑लु॒लोभ॒ चर॒त्यन॑नु॒व्रता॑।
 तन्मे॒ रेतः॑ प्र॒पिताम॒हो वृ॑ङ्क्तां
 मा॒भुर॒ण्योऽव॑पद्यताम॒मुष्मै॒ स्वाहा॑।
 अ॒न्तर्द॑ध ऋ॒तुभि॑र॒होरा॒त्रैस्स॑स॒न्धिभिः॑।
 अ॒र्धमा॑सैश्च॒ मासै॑श्चान्तर॒न्यं
 प्र॑पिताम॒हाद्वे॑ऽमु॒ष्मै॒ स्वाहा॑।
 ये चे॒ह पि॒तरो॒ ये च॒ नेह॑ याग्श्च॑
 वि॒द्म याग्ं॑ उ॒ च न॑ प्र॒विद्म॑।
 अग्ने॑ तान् वै॒त्थ॒ यदि॑ ते जा॒तवे॑द॒स्तया॑
 प्र॒त्तग्ग्॑ स्व॒धया॑मदन्तु॒ स्वाहा॑।
 स्वाहा॑ पि॒त्रे।
 पि॒त्रे स्वाहा॑।
 स्वाहा॑ पि॒त्रे।
 पि॒त्रे स्वाहा॑।
 स्व॒धा स्वाहा॑।
 अ॒ग्नये॑ क॒व्यवा॑ह॒नाय॑ स्व॒धा स्वाहा॑।
 ए॒ष ते॑ त॒त म॑धु॒माग्ं ऊ॒र्मिस्सर॑स्वा॒न्
 यावा॑न॒ग्निश्च॑ पृथि॒वी च॒ ताव॑त्यस्य मा॒त्रा
 ताव॑तीं त ए॒तां मा॒त्रां द॑दामि॒

यथाऽग्निरक्षितोऽनुपदस्त ए॒वं मह्यं॑
 पि॒त्रेऽक्षि॒तोऽनु॑पदस्तस्व॒धा भ॑व॒ तां त्वग्ग्
 स्व॒धां तैस्स॒होप॑जीव॒र्चस्ते॑ महि॒मैष॑ ते
 पि॒ताम॒ह॒ मधु॑माग्ं ऊ॒र्मिस्सर॑स्वान् यावान्
 वा॒युश्चा॒न्तरि॑क्षं च॒ ताव॑त्यस्य मा॒त्रा ताव॑तीं त
 ए॒तां मा॒त्रां द॑दामि॒ यथा॑ वा॒युर॑क्षि॒तोऽनु॑पदस्त
 ए॒वं मह्यं॑ पि॒ताम॒हाया॑क्षि॒तोऽनु॑पदस्तस्व॒धा
 भ॑व॒ तां त्वग्ग् स्व॒धां तैस्स॒होप॑जीव॒ सामा॑नि ते
 महि॒मैष॑ ते॑ प्र॒पिता॑म॒ह॒ मधु॑माग्ं
 ऊ॒र्मिस्सर॑स्वान् यावा॑नादि॒त्यश्च॒ द्यौश्च॒
 ताव॑त्यस्य मा॒त्रा ताव॑तीं त ए॒तां मा॒त्रां द॑दामि॒
 यथा॑ऽऽदि॒त्योऽक्षि॒तोऽनु॑पदस्त ए॒वं मह्यं॑
 प्र॒पिता॑म॒हाया॑क्षि॒तोऽनु॑पदस्तस्व॒धा भ॑व॒ तां
 त्वग्ग् स्व॒धां तैस्स॒होप॑जीव॒ यजूग्ं॑षि ते महि॒मा ॥ 19 ॥

अ॒मुष्मै॑ स्वाहा॑ स्व॒धा स्वा॑हैकं च ॥ 19 ॥

पृथि॒वी ते॒ पात्रं॑ द्यौर॑पि॒धानं॑ ब्रह्म॑णस्त्वा॒ मुखे॑ जुहोमि
 ब्राह्म॑णानां॑ त्वा प्राणा॑पानयो॑र्जुहो॒म्यक्षि॑तमसि॒
 मैषां॑ क्षे॒ष्टा अ॒मुत्रा॑मुष्मि॒न्लोके॑ ।
 मा॒र्जय॑न्तां॒ मम॑ पि॒त्रो मा॒र्जय॑न्तां॒ मम॑
 पि॒ताम॒हा मा॒र्जय॑न्तां॒ मम॑ प्र॒पिता॑म॒हा

म॒र्जय॑न्तां॒ मम॑ मा॒तरौ॑ मा॒र्जय॑न्तां॒ मम॑
 पि॒ताम॒ह्यो मा॒र्जय॑न्तां॒ मम॑ प्र॒पिताम॒ह्यः।
 ए॒तत्ते॑ त॒तासौ॑ ये च॒ त्वाम॒न्वे त॒त्ते
 पि॒ताम॒हासौ॑ ये च॒ त्वाम॒न्वे त॒त्ते
 प्र॒पिताम॒हासौ॑ ये च॒ त्वाम॒न्वे त॒त्ते
 मा॒तरसौ॑ याश्च॒ त्वाम॒न्वे त॒त्ते
 पि॒ताम॒ह्यसौ॑ याश्च॒ त्वाम॒न्वे त॒त्ते
 प्र॒पिताम॒ह्यसौ॑ याश्च॒ त्वाम॒नु।
 म॒र्जय॑न्तां॒ मम॑ पि॒तर॒ इत्ये॒ते।
 ये च॒ वोऽत्र॒ ये चा॒स्मास्वा॑शग्ं॒ सन्ते॒ याश्च॒
 वोऽत्र॒ याश्चा॒स्मास्वा॑शग्ं॒ सन्ते॒ ते च॑
 वह॑न्तां॒ ताश्च॑ वह॑न्तां॒ तृप्य॑न्तु
 भव॑न्त॒स्तृप्य॑न्तु भव॑त्य॒स्तृप्य॑न्त॒ तृप्य॑न्त॒ तृप्य॑न्त॒।
 पु॒त्रान्पौ॒त्रान॒भि त॒र्पय॑न्ती॒रापो॒ मधु॑मती॒रिमाः॑।
 स्व॒धां पि॒तृभ्यो॑ अ॒मृतं॑ दु॒हाना॑
 आपो॑ दे॒वीरु॒भयाग्ं॑स्त॒र्पय॑न्तु।
 तृप्य॑न्त॒ तृप्य॑न्त॒ तृप्य॑न्त॒।
 प्रा॒णे नि॒विष्टो॑ऽमृतं॑ जु॒होमि॑
 ब्रह्म॑णि म आ॒त्माऽमृ॑त॒त्वाय॑।
 यां ज॒नाः॑ प्र॒तिन॑न्दन्ति॒ रात्रिं॑ धे॒नुमि॑वाय॒तीम्।
 सं॒व॒त्स॒रस्य॑ या प॒त्नी सा नो॑

अस्तु सुमङ्गली स्वाहा॥
 वहं वपां जातवेदः पितृभ्यो
 यत्रैनान् वेत्थ निहितान्पराके।
 मेदसः कूल्या उप तान्क्षरन्तु सत्या
 एता आशिषस्सन्तु कामैस्स्वाहा॥
 यां जनाः प्रतिनन्दन्तीत्येषा।
 इयमेव सा या प्रथमा व्यौच्छदिति तिस्रः।
 एकाष्टकां पश्यत् दोहमानामन्नं
 मागंसवद्धृतवथ्स्वधावत्।
 तद्ब्राह्मणैरतिपूतमन्तमक्षय्यममुष्मिन्लोके
 स्फीतिं गच्छतु मे पितृभ्यस्स्वाहा॥
 औलूखला ग्रावाणो घोषमक्रत
 हविः कृण्वन्तः परिवथ्सरीणम्।
 एकाष्टके सुप्रजा वीरवन्तो वयग्ग् स्याम
 पतयो रयीणाम्।
 एकाष्टका तपसा तप्यमाना संवथ्सरस्य
 पत्नीं दुदुहे प्रपीना।
 तं दोहमुपजीवाथ
 पितरस्सहस्रधारममुष्मिन्लोके स्वाहा॥ 20 ॥

आयुतीं प्रपीनैकं च ॥ 20 ॥

उक्थ्यंश्चाऽस्यतिरात्रश्च साद्यस्क्रीश्छन्दसा सह।

अपूपघृताहुते नमस्ते अस्तु माग्ं

सपिप्पले स्वाहा॥

भूः पृथिव्यग्निर्चाऽमुं मयि कामं

नियुनज्मि स्वाहा॥

भुवो वायुनाऽन्तरिक्षेण साम्नाऽमुं मयि

कामं नियुनज्मि स्वाहा॥

स्वर्दिवाऽऽदित्येन यजुषाऽमुं मयि कामं

नियुनज्मि स्वाहा॥

जनदद्विरथर्वाङ्गिरोभिरमुं मयि कामं

नियुनज्मि स्वाहा॥

रोचनायाजिरायाग्रये देवजातवे स्वाहा॥

केतवे मनवे ब्रह्मणे देवजातवे स्वाहा॥

स्वधा स्वाहाऽग्रये कव्यवाहनाय स्वधा स्वाहा॥

अन्नमिव ते दृशे भूयासं वस्त्रमिव ते दृशे

भूयासं वित्तमिव ते दृशे भूयास माशेवं ते

दृशे भूयासग्ं श्रद्धेवं ते दृशे भूयासग्ं

सग्ं स्रवन्तु दिशो महीस्समाधावन्तु सूनुताः।

सर्वे कामा अभियन्तु मा प्रिया

अभिरक्षन्तु मा प्रियाः।

यशोऽसि यशोऽहं त्वयि भूयासमसौ।

अ॒ङ्कौ न्य॒ङ्काव॒भित् इत्ये॒षा।
 अध्व॑नामध्वपते स्व॒स्ति मा॒ सम्पा॑रय।
 अ॒यं वा॑म॒श्विना॒ रथो॒ मा दुः॒खे मा सु॒खे रि॑षत्।
 अरि॑ष्टस्व॒स्ति ग॑च्छतु॒ विवि॒घ्नन्पृ॑त॒नाय॒तः।
 अश्वो॑सि॒ हयो॒स्यत्यो॑सि॒ नरो॒स्यर्वा॑ऽसि॒ सति॑रसि
 वा॒ज्यसि॒ वृषा॑ऽसि॒ नृमणा॑ असि॒
 ययु॑र्नामा॑स्याऽऽदि॒त्यानां॑ प॒त्वाऽन्वि॑हि।
 ह॒स्ति॒य॒श॒सम॑सि॒ हस्ति॒य॒श॒सी भू॑यासं॒ वहं
 काल॑वह॒ श्रियं॑ मा॒ऽभिव॑ह।
 इन्द्र॑स्य॒ त्वा वज्रे॑णा॒भि निद॑धाम्यसौ।
 अव॑ जिह्वक॒ निजिह्व॑काव॒ त्वा ह॒विषा॑ यजे।
 तथ्स॒त्यं यद॑हं ब्रवी॒म्यध॑रो॒ मद॒सौ व॑दा॒थ्स्वाहा॑।
 आ ते॒ वाच॑मा॒स्यां दद॒ आ म॑न॒स्याग्ं हृद॑या॒दधि॑।
 यत्र॑यत्र॒ ते वाङ्मि॑हि॒ता तां त॒ आद॑दे।
 तथ्स॒त्यं यद॑हं ब्रवी॒म्यध॑रो॒ मत्प॑द्यस्वा॒सौ ॥ 21 ॥

सू॒तृतां ह॒विषा॑ यजे च॒त्वारि॑ च ॥ 21 ॥

या तं॑ ए॒षा र॑रा॒ट्यां त॒नूर्म॒न्योर्मृ॑ध्रस्य॒ नाशि॑नी।
 तां दे॒वा ब्र॑ह्मचा॒रिणो॒ विन॑यन्तु सु॒मेध॑सः।
 यत्तं॑ ए॒तन्मुखे॑ऽम॒तग्ं र॒राट॑मुदि॒व वि॑ध्यति।
 वि ते॒ क्रोधं॑ नयामसि॒ गर्भ॑मश्व॒तर्या॑ इव।

अव॒ ज्यामि॑व॒ धन्व॑नो हृ॒दो म॒न्युं त॑नोमि ते।
 इन्द्रा॑पा॒स्य प॒लि॒गम॑न्येभ्यः पुरु॑षेभ्योऽन्यत्र॒ मत्।
 यद॒हं ध॑नेन॒ प्रप॑णग्श्च॒रामि॑ ध॒नेन॑
 दे॒वा ध॑न॒मिच्छ॑मानः।
 तस्मि॑न्त्सोमो॒ रुच॑माद॒धात्व॑ग्निरिन्द्रो
 बृ॒हस्प॑तिश्च॒ स्वाहा॑।
 परि॑ त्वा गिरेरमिहं परि॒ भ्रातुः॑ परि॒ष्वसुः॑।
 परि॑ सर्वे॑भ्यो॒ ज्ञाति॑भ्यः परि॒षीतः॑ क्वे॑ष्यसि।
 शश्च॑त्परि॒कुपि॑तेन स॒ङ्क्रामे॑णाऽवि॑च्छिदा।
 उ॒लेन॑ परि॒षीतो॑सि परि॒षीतो॑स्यु॒लेन॑।
 आ॒वर्त॑न॒ वर्त॑येत्येषा।
 आ॒वर्त॑ने नि॒वर्त॑न आ॒वर्त॑ननि॒वर्त॑नाय॒ स्वाहा॑।
 अनु॑ पोऽहृ॒दनु॑हृयो नि॒वर्तो॑ पो॒ न्यवी॑वृतत्।
 ऐ॒न्द्रः परि॑क्रोशो वः परि॑क्रोशतु स॒र्वतः॑।
 यदि॑ मामति॒ मन्या॑ध्वा॒ अदे॑वा दे॒वव॑त्तरम्।
 इन्द्रः॑ पाशेन॒ सिक्त्वा॑ वो
 म॒ह्यमि॒द्वश॑मान॒यात्स्वाहा॑।
 यदि॑ वृ॒क्षाद्य॑द्यन्तरि॒क्षात्फल॑म॒भ्यप॑त॒त्तदु॑ वा॒युरे॒व।
 यत्रा॑स्पृ॒क्षत्त॑नुवं॒ यत्र॑ वास॒ आपो॑ बाधन्तां
 निर्ऋ॑तिं परा॒चैः।
 ये प॒क्षिणः॑ प॒तय॑न्ति बि॒भ्यतो॑ निर्ऋ॒तैस्स॒ह।

ते मां शिवेन शग्मेन तेजसोन्दन्तु वर्चसा।
 दिवो नु मां बृहतो अन्तरिक्षाद्पाग
 स्तोको अभ्यपतच्छिवेन।
 समहमिन्द्रियेण मनसाऽहमागां ब्रह्मणा
 सम्पृचानस्सुकृता कृतेन।
 इमं मै वरुण तत्त्वां यामि त्वं नो अग्ने स त्वं नो
 अग्ने त्वमग्ने अयाऽसि प्रजापते।
 संराजं च व्याहृतीर्विहृताः।
 इमं जीवेभ्यः परिधिं दधामि मैषां नु
 गादपरो अर्धमेतम्।
 शतं जीवन्तु शरदः पुरूचीस्तिरो मृत्युं
 दधतां पर्वतेन ॥ 22 ॥

क्वेष्यसि पराचैरष्टौ च ॥ 22 ॥

उष्णेन पञ्चदशायुर्दा एकविंशतिरागन्त्रा दश योगेयोगे
 त्रयोदश सुश्रवस्सुश्रवसमष्टौ परि त्वाऽग्न इमग्
 स्तोममायुष्यमेकान्न विंशतिरेकान्न विंशतिर्मयि
 पर्वतपूरुषगं षोडश त्रय्यै विद्यायां अष्टादश धाता
 ददातु नो रयिमेकविंशतिरश्मा भव षोडश मा तै
 कुमारं त्रयोविंशतिर्नक्तश्चारिणश्चतुर्दश यद्भूमेष्पद्विंशतिः
 कूर्कुरः पञ्चविंशतिरिन्द्रं जहि द्वाविंशतिः
 परमेष्ठ्यसि परमामष्टौ यन्मै माता पृथिवी ते

पात्र॑मेक॑वि॒ंशति॑रेक॑वि॒ंशति॑रु॒क्थ्य॑श्च
त्रयो॑वि॒ंशति॑र्या॒ तं ए॒षाऽष्टा॑वि॒ंशति॑र्द्वावि॒ंशतिः॑ ॥ 22 ॥

उ॒ष्णेन॑ धा॒तोक्थ्य॑श्च॒ द्वावि॒ंशतिः॑ ॥ 22 ॥

उ॒ष्णेन॑ पर्व॑तेन ॥

॥ हरिः॑ ओ(३)म् ॥

॥ इति॑ एका॒ग्रिका॑ण्डे द्वितीयः प्रश्नः समाप्तः ॥